



開心農場

寒流來矣，霜風冷冷，破病仔厝裡咧靜養，拄好阿美敲電話來招我去個的農場迫迫咧。橫直閒閒，無就來去行行咧嘛好。

講「農場」其實嘛毋是啥物農場，看起來較成是零星地仔。哪會有這塊零星仔地咧？原來是個大官有一塊三分外的菁仔園，拄倚仔圳溝邊，溝仔底不時會積塗糜，鄉公所便若派人來清圳溝，塗就順勢對個的菁仔園遺。本底個的地勢有較低，毋過年久月深，挖起來的塗一沿疊過一沿，煞嘛共圳溝墘坵做一條五十米長、四米闊的新生地。

舊年個大官因為車禍往生去，大家嘛致著老人癡呆症。伊做人的大漢新婦，看菁仔園佇遐發草嘛真袂過心，鋤頭擲咧，規氣落去共開墾做菜園。倩來顧個大家的外勞『A-ti-á』，早前彼個頭家真愛變園藝，有教伊一寡仔種作的鉞角，都也真骨力，看頭家娘咧無閒掘塗、種菜，嘛會來鬥相共。

兩個身懸攏無夠百六的查某人，逐工工課做了就來泥田塗，菜股掘好就去買菜子來掖。趁阿媽咧暈中晝，就 oo-tóo-bái 騎咧相載去園藝店買樹仔栽恰花子。一塊仔地予個變變咧，煞變甲五花十色。有紅色的大理菊、紅鳳菜、柑仔蜜；黃色的金瓜恰改良過的時計果；青的是拔仔、柚仔、大同仔；白的是苦瓜，閣有茄仔色的茄仔。

黃薑仔恰九層塔是『A-ti-á』對印尼紮來的種，若有收成伊就會提黃薑仔來做餅。知影我著癌，『A-ti-á』隨擲掘仔去掘三塊黃薑仔予我，講彼有抗癌的功效。除了種作以外，阿美個翁閣搭一間雞牢予伊通飼雞鴨。逐下晡去沃水、挽菜、掠蟲的時，就順繼焯麥片予遐的雞仔、鴨仔食。

當當眾人佇面冊咧耍開心農場的時，阿美家己就有一座真正的開心農場矣。伊講個大官車禍了後，有一站仔伊心情足齷齪。自開墾這個農場以後，生活有重心，看菜蔬咧生長嘛予伊感受真濟的快樂。伊的農場細罔細，毋過逐項齊有。會當食著家己種的有機菜蔬，彼是金錢買袂著的體驗。

作者：霽虹

☆詞彙學習☆

- | | |
|---|-----------------------------------|
| 【菁仔】tshenn-á/tshinn-á：未加工的檳榔。 | 部分。 |
| 【塗糜】thôo-muê/thôo-bê：又唸作
thôo-muâi。泥漿、爛泥巴。 | 【泥】tshiók：用腳在水或泥濘中踩、踏。 |
| 【過心】kuè-sim/kè-sim：過意。 | 【焯】sáh：以白水煮。把食物放入滾水、不加其他佐料的一種烹飪法。 |
| 【鉞角】mê-kak：比喻事物細小而且緊要的 | 【齷齪】ak-tsak：心情鬱悶、煩躁。 |